



Uunga:

Anda Uldum
Inatsisartunut ilaasortaq

§ 37 naapertorlugu apeqquteqaat normu 129-mut akissuteqaat Naalakkersuisunut apeqqutit Maniitsumi innuttaasunik ataatsimiititsineq pillugu

Inatsisartut suleriaasianni § 37 naapertorlugu apeqquteqaat Inatsisartunut ilaasortamit
Anda Uldum-imit, Demokraatineersumit saqqummiunneqartoq Naalakkersuisut ulloq 13.
juni 2014 tiguuat.

Akissuteqaat apeqqutit kingornanni takuneqarsinnaavoq.

26-06-2014
Sags nr. 2014-101256
Dok. nr. 1619238

Postboks 1015
3900 Nuuk
Tlf. (+299) 34 50 00
Fax (+299) 32 50 02
E-mail: govsec@nanoq.gl
www.naalakkersuisut.gl

1. Siumup Naalakkersuisuni ilaasortaaitai arfineq-marluk ulloq 9. juni Maniitsumi innuttaasunik ataatsimiititsipput. Isertorneqassanngilaq taakku Naalakkersuisunut ilaasortat Maniitsumiimmata Siumup nuna tamakkerlugu ataatsimeersuarneranut atatillugu. Tamanna tunngavigalugu Naalakkersuisunut uppersartikkusuppara, Naalakkersuisut pineqartut Maniitsumi innuttaasunik ataatsimiititsinerannut atatillugu Naalakkersuisut/Namminersorlutik Oqartussat aningaasartuuteqarsimanngitsut

Akissut:

Naalakkersuisut illoqarfinni nunatsinni angallavigisaminni sapingisamik ajornanngippat innuttaasunik ataatsimiititsisarput. Innuttaasut naalakkersuisuminnik naapitsinissamat periarfissinneqarnissaannut Naalakkersuisut pisussaaffeqarput – illoqarfimmut sorlermut Naalakkersuisut ornigunnersut apeqqutaatinnagu aammalu innuttaasut politikikkukut qanoq isummertaaseqarnerat apeqqutaatinnagu. Tamanna partiit pisussaaffiginngilaat, kisianni Naalakkersuisut pisussaaffigalugu. Taamaallunilu Naalakkersuisut kisimik innuttaasunik ataatsimiititsineranut taamaattunut atatillugu aningaasartuuteqartussaapput. Naalakkersuisunut ilaasortat tamarmik partii apeqqutaatinnagu Maniitsumi innuttaasunik ataatsimiititsinermit peqataanissamat neqeroorfigineqarput. Taamaattumik Naalakkersuisut namminneq Maniitsumut tassanngaanniillu angallanneqarnerminnut aammalu akunnittarfimmi unnuinerminnut ataatsimut aningaasartuutinik akiliipput. Tamatuma saniatigut inimut ataatsimiittarfimmut kiisalu ataatsimiinnerup nalaani imeruusaatinut aningaasartuuteqartoqarpoq.

2. Avatangiisinut Pinngortitamullu Naalakkersuisup ilinniakkat suut eqqarsaatigai oqarami, ilinniartoqarsinnaasoq kalaallisuinnaq ingerlanneqartumik aamma

Naalakkersuisut tamarmiullutik suut ilinniakkat eqqarsaatigaat oqartoqarmat siunissami ilinniakkat kalaallisuinnaq ingerlanneqarsinnaalissasut?

Akissut:

Naalakkersuisut pingaartutut isigaat ilinniartitaanerit tamanit iluaqutigineqarsinnaanissaat, aamma innuttaasunit kalaallisuinnaq oqaaseqartunit, – taakkuami mattunneqassanngillat ilinniagaqarnissamut sinnattuminnik ingerlatsisinnaanissaannut. Taamaattumik Naalakkersuisut assut nuannaarutigalugu nalunaarutigisinnaavaat, ullumikkut inuussutissarsiutinut ilinniartitaanerni ilinniagaasinnaasunik arlalinnik peqarmat, kalaallisut ingerlanneqarsinnaasunik.

Ilinniakkani uani pineqartuni atuuppoq ilinniakkat taakkua kalaallisut oqaluttunik, imaluunniit marluinnik oqaasilinnik ilinniartitsisoqaramik. Ilinniakkallu ilaat kalaallisuunik ilinniuteqarput, allalli pingaarnertut danskit oqaasii atorlugit ilinniutitaqarlutik, oqaatsit allassimaffii il.il. iluaqutigalugit ilinniutinut atortorissaaruteqarlutik, atuartitsisuusullu ikiuunnerat nassuiaataallu iluaqutigalugit ilinniartunut atugassiissutigineqartartuullutik.

Ilinniarsiillu aamma amerlasuutigit isumagisarpaat ilinniagaqartut kalaallisut oqaasillit ilinniakkami ingerlannerata saniatigit danskit oqaasiinik ilinniagaqarsinnaanerit, ilinniagaqarsinnaassusiat annertusarniarlugu.

Inuit amerlanerujartortut ilinniagaqartalernerat ilutigalugu Naalakkersuisut pissusissamisoortutut isigaat inuit kalaallisut oqaaseqartuusut kalaallisullu kulturikkut tunngavillit amerliartortut ilinniakkami iluini atuartitsisutut sulisunngortarneri, - taamatummi ingerlaaseqarnitta annertusaavigissavaa kalaallisut oqaasillit amerlanerujartortut nunatsinni ilinniagaqartalernissaat.

Nunatsinni innuttaasut namminneq oqaatsitik atorlugit ilinniagaqarsinnaanerannik neqerooruteqartarneq Naalakkersuisut anguniakkatut pissusissamisoorluinnartutut isigaat, tamannalu aamma siunissami malersoqqinneqassaaq. Tamatumali mattutinnigilaa oqaatsinik allanik atuisuunissaq, - tassami oqaatsinik allanik atuisuunerup inuit ataasiakkaat silarsuaat annertunerulersittarmagu, taamalu aamma ilinniagaqarsinnaanerit periarfissaqartitsinerulerluni.

Inussiarnersumik inuulluaqqusillunga
Med venlig hilsen



Aleqa Hammond